

東臺縣志卷之二十九 傳十

隱逸

睠彼碩人窮退相高遊戲污瀆頤光山椒師友造  
化藻掩鱗韜野田種菜荒海結茅風雨一編謝絕  
煩囂逐逐者子勿哂堅匏志隱逸

明

繆汝信耕茶人性篤厚醇粹爲繆繼泉嗣子後繼泉生  
三子汝信處父母昆弟閒無絲毫猜忌生平嗜學不  
厭更精韜略隱居樂志不慕仕進年七十三卒有詩  
集藏於家

東臺縣志

卷之二十九

隱逸

一

傳本淵字伯子安豐人性廉介博涉經史善詩歌隱居  
無求忘懷得失人服其高

丁轅富安人幼補州庠生尋棄去分司某推舉鄉行嘉  
其不出戶庭閑於禮義聞於侍御洪公署其門曰善  
人

吳纘姬字璣灘安豐人其先以旗籍隸登州曾祖國相  
嘉靖中以進士官南京戶部欲回籍不果及纘姬舉  
於鄉值山左亂挾弓持稍護二親出重圍遂成祖志  
還居海陵爲人慷慨負氣節事親至孝雖流離中克  
色笑甘旨無缺後親老以嘉遯終

以上舊  
十場志

國朝

季來之字大來安豐人少敏悟就童子試一日奏成數  
藝提學韋宗孔雅重之時宮驚鄰爲孝廉奇其文延  
至家課其子偉鏐崇禎壬午師弟同舉於鄉後偉鏐  
成進士來之歸而食貧益以狷介見重名公卿尤篤  
於天倫嘗自題楹帖曰一父母同生四人看這等弟  
兄至真至切諸兒孫毋歧半念說甚麼家產可少可  
多又嘗爲六要箴訓子弟曰心要細膽要宏口要謹  
氣要沉色要和言要溫晚歲益潛心理學日聚學者  
講論一夕夢王良與共講學署其室曰誠心堂素能

東臺縣志

卷之二十九

隱逸

一一

飲痛父以酒邁病遂斷飲晚隱於仇湖終身不出其  
自訣詩云兩大君親總未酬一身拋卻義全收時人  
莫笑書生拙留得衣冠葬古邱

泰州志  
參遺集

王大成字集之安豐人博學能文章明末隱居海上托  
業於醫順治中疫癘盛行嘗施醫藥有餘資輒賙窮  
乏者年六十七無子撫弟大宗遺孤子儁子偉有恩

二子事之如父

康熙中  
十場志

吳嘉紀字賓賢號野人安豐人幼負異姿成童時習舉  
子業操觚立就見地迥出人意表無何輒棄去曰男  
兒自有成名事奚必青紫爲自是專工爲詩歷三十

年絕口不譚仕進蓬門蒿徑樂以忘饑其爲詩王七  
言律可方駕高岑古體則直逼漢魏久之聲開海內  
鉅公名流咸樂與交周亮工櫟園爲運使聞其名亟  
招之爲刻其詩以行王士正貽上作序由是東南諸  
君子先後造訪郵筒無虛日爭識其人以爲快性篤  
於孝弟交朋友無閒死生歛程琳死揚州東淘王衷  
丹死虎墩二人皆無後嘉紀不憚跋涉爲經理其喪  
葬其生平高義多類此所著有陋軒詩集康熙中  
十場志  
王言綸字鴻寶安豐人隱於樊村以詩歌自娛與同里  
吳嘉紀沈昉開友善稱爲三逸著有棘人草泰州  
志

東臺縣志

卷之二十九

隱逸

三

崔汝善號五陵富安人少讀書有大志旣而不遇卽絕  
意進取然嗜學不厭行止坐卧恒手一編晚年家愈  
貧惟說經糊口所居茅屋數椽啖藜蔬茹麥飯甘之  
若飴時混迹漁樵間若不知人世有富貴者遂以此  
終老焉

盧焰號鳳山富安人性廉介不慕榮祿居 布衣蔬食  
一切戶外事悉置不問然獨喜行善事當崇禎時歲  
屢饑焰量田之八計口受糧有餘盡以助賑不足則  
鬻產繼之全活無算州府屢舉鄉飲賓固辭不就尙  
書馮疏薦報可就其家賜鴻臚寺序班命知州躬造

其廬仍堅辭以草野不任冠服避匿不見蕭然杖履  
與宗族兄弟二三輩逍遙觴詠以樂天年壽八十九  
臨終端坐中庭集諸子孫誠以忠厚勤儉耕讀爲本  
語畢而逝

王潤赤梁槩人少年攻苦入庠序貧窶殊甚殆淵明所  
謂三旬九遇食十年著一冠者也而高視濶步了無  
慚色晚年避迹窮村歌詠不輟壽八十五

以上康熙  
中十場志

孔子所云逸民蓋謂有道而不仕者也若適志邱  
樊遊心吟咏則一散人耳烏足稱哉如季來之吳  
嘉紀諸人人皆知其爲詩人矣顧不以列文苑而

東臺縣志

卷之二十九

隱逸

四

列隱逸昭其志也